

麟原文集

詳校官檢討臣德生

中書臣劉源溥覆勘

總校官庶吉士臣倉聖脉

校對官中書臣張培

謄錄監生臣華春芳

欽定四庫全書

麟原前集卷三

元 王禮 撰

行狀

德慶路郭推官行狀

公諱某字民則姓郭氏廬陵人也系出汾陽王之第九子金陵府君府君仕于吉因家邑之麻江五世祖某徙葛陂在宋以科第顯內附初科詔未下至大三年公游京師集賢院以茂異舉皇慶初筮仕濟南學正既至即

訪求碩儒以新學校得張公起岩師表後進延祐科興
張以明經進士魁天下士類益服公之知人已而東昌
分憲以公性行溫純問學博洽保充館閣之職銓曹奉
行不力公亦以躋等辭至治間授潘陽路安撫使司高
麗軍民總管府儒學教授歷兩考陞將仕佐郎永豐縣
主簿任未滿丁內艱居喪盡禮弔者悅服服闋或勉之
仕則喟然嘆曰始也干升斗之祿為養故也自今以往
其無意于斯世矣况敢希榮名之寵乎改兩浙都轉運

使長林場司丞竟不赴後選充京城義儲倉使公府催
迫上道比到官勤謹自持五侯七貴餽稟之供入薄而
出厚隳私以償公處之晏如無幾徵見于辭色遷福安
州判官以鄉里親舊所在杜門息交六載如一日州之
長王侯德貞廉潔士也無得而少焉後以徵仕郎任興
國經歷省臣辟充理問委赴江西求援未報而湖廣陷
遂留豫章朝廷以淮氛滋昏道路壅隔命行省便宜銓
注又有德慶推官之命國步險艱而公由是勇退矣禮

聞公神情蕭散美髭髯孝友根乎天性子弟有片善獎
借不離口世慮澹泊而交誼繾綣賓舊過從歌詠傾動
予駢儷之文尤敏給使朝廷用舉者言寘之清要必黼
黻皇猷克稱其職何至馳驅簿書以老令人有用乖其
材之恨哉嗚呼悽矣故老子今落落矣公生于 闕 丁

亥没于 闕

辛丑享年七十有五父肇慶府君贈從仕

郎高安縣尹母劉氏李氏俱贈高安縣君妻涂氏封宜
人壽八十而終子男三人子年子明子禮女一人在室

孫四人諸孤以其年臘月葬于里之泉江山五年後余
過葛陂公之冢子與余有故幸氛祲之始清慨譖乘之
淪落俾狀其行以俟求銘于先友之相知者禮惟終慕
之孝有不可辭故次第其槩以為之狀云前鄉貢進士
廣東道宣慰使司都元帥府照磨王禮狀

澗月居士胡君行狀

君諱履輝字清翁吉之太和禾溪人也其先五季時由
長沙辟地徙于吉派別有三孟為值夏之胡若忠簡公

銓其後也仲為南城之胡策慶厯六年第仕至朝奉大夫衍者其後也季為永溪之胡分徙黃漕若進士南城丞箋暨居和溪者多其後也曾祖必舉字伯俊妣龍氏祖士茂字國秀歸附初以豪俊靖邑里人稱古澗先生妣劉氏父元永字宗遠一字東隱妣蕭氏陳氏君初生時大父夢月墮掌中命名曰月比長明敏穎達幹蠱用裕公私酬酢輕財個儻弛張合宜遇事即始見終通變不拘語儒不流于迂語吏不期于刻理較曲直不苟挫

于人卓然能自樹立思大其家聲居當孔道迎送無虛
日不倦力雖後人豐貲富積無遠識者恒下之人謂東
隱為不死念父沒抱不終養之憾事祖母劉尤竭其力
寒燠之候滑甘脩滷之奉必躬視之母蕭氏先卒奉繼
母無幾微不用其極兄弟四人君處其次佩服先訓聚
居尊禮堂友恭怡怡始終如一季弟履寧實陳氏出也
觀光京國屢易寒暑而無離憂者知兄左右盡養猶已
在膝下也陳年踰八袞遭承國恩賜帛公率昆弟子姓

升堂奉觴為壽潘輿萊衣焜煌後先歡洽三世鄉人榮
之胸次和易爽朗如春風秋月不為崖岸險絕與鄉鄰
處紛難以解釁隙以平里有巡徼從政者必賴以為治
焉所居郭家渡舊有徒杠橫跨洶湧先世所建君繼志
修理行者德之若閑林寺重修清福菴崇道觀特建混
元壇割田樹碑立祠奉先以托悠久非求福田利益也
中歲以生齒日蕃先廬不足以容乃求地溪東卜築杜
山之下幽蔚夷曠翠合青回儲書有樓彈琴有室又闢

南齋以聘師訓子為先務列置誠齋楊文節公福榮堂
記煥章閣學士艮齋謝公儒林精舍記及祖若父墓文
諸碑刻之存者于庭復輯錄誠齋艮齋文信國公須溪
劉太史青山趙先生麟洲龍先生諸名勝與先世往來
詞翰序述暨忠簡公遺帖古澗吟藁盡刻梓以傳名曰
胡氏流芳集其拳拳詩書門戶詒厥孫謀類此晚別字
澗月因以名堂示不忘先祖夢兆也搢紳先生喜其名
實相副若吳草廬龍麟洲夏果齋虞邵菴而下為詞詠

歌之者累百篇又作還菴于居側取趙文敏公子昂所書蓬寓二字榜之性酷嗜古書名畫精于鑒別暇日與子弟擇其尤善者類分而貯之以資玩覽花時月夕觴咏怡神樂其餘年而時殊事異有足興慨者矣于是屬其子弟語之曰古今治亂相乘驗之前史可見承平混一幾百年厥今四郊多壘履霜堅冰其可憂者乎吾氏之居此土忠厚傳世殆非一日達而在上立乎人之本朝則當抗言極論不避權奸以忠簡公為法窮而在下

無民社之責則當保障鄉曲毋縱反側以古澗公為法
況我里當義山遂水之衝冥頑之斬木揭竿者日相繼
也鄉黨宗族之所依祖宗坟墓之所托保庇之責其容
可後乎散儲蓄聚丁壯絕奸惡滋蔓為官府藩維正今
日事也汝曹試思之君今捐館已十年陵谷之感何限
而令子屹然砥柱中流使鄉里按堵如故是豈偶然也
哉君娶岳氏宋進士衍之五世孫也子男四人長志楫
初以軍功授巡檢次志安繼兄履坦後次志道志德繼

弟履常履寧後女二長適劉次適岳孫男三奎煥倬公
生乙未二月九日歿於至正丁酉四月八日葬於所居
之後嗚呼以君之才之識使當賢智馳驅不足之日得
效一官任一職豈不綽綽乎有足觀者而竟齎志以歿
為人才世道惜者能不恨恨于斯乎禮之里違和溪一
舍而遙知君家世舊矣又嘗與君之子遊益得君平生
梗槩故序述其行俾得藉手以請銘焉光幽發潛仁人
君子必有哀而賜之者矣謹狀

李教授主敬行狀

曾祖長翁

祖崇甫

父翔飛懷集教官

妣劉氏

君諱主一字主敬姓李氏廬陵朋田人唐西北忠武王晟生嶺南節度使憲憲生宜春府君游游家宜春至孫服應南唐三經科始遷廬陵朋田累徵不仕賜號三經

處士蓋自宜春徙居吉者衆朋田則處士之系也吳文
正公題其家乘曰西平十五子南土百千孫墨蹟具在
世業儒由科第起家者累累有焉君少負奇才俊氣登
祝融歷長沙窺九疑慕聖賢之遺風考載記之往跡一
時名士魯樵雲輦志道貫子素燮元浦楊伯謙輩深器
重之邂逅湘潭傾情輸胆揮觴落筆明日傳誦得聲吳
楚間豈過情哉尤為廣西元帥章公所敬舉充陽朔校
官不就後試吏宣城存心及物上下宜之適丁外艱後